

Homenahe na e gran músico Rufo Wever, cu varios di su música riba CD

ORANJESTAD - Si e tabata na bida, Diarazon awor, dia ocho di December e lo a cumpli 76 aña.

Su nomber ta Rufo Innocencio Wever, kende a revolucioná mundo musical di Aruba, un berdadero genio.

P'esey, un grupo di admirador y amigo a dicidí pa uni esfuerso y prepará algo cu lo perdurá, esta un CD di e maestro, caminda e conocido pianista Victor Camacho lo interpretá su música como si fuera Rufo mes tabata na piano, pues, magistralmente.

Danki na e intervencion di Aruba Recording Studio y su experticio e CD a keda técnicamente inmejorable, e grabacion a bira un berdadero joya cu indudablemente lo brinda alegría den hopi hogar, especialemnte den e dianan di Navidad aki.

Diarazon awor, ta recordá fecha di nacemento, e CD aki lo wordo bautizá pa 7:30 durante un ceremonia chiquito den e casino di Aruba Hilton Hotel. E CD ta contené 10 di e piezanan mas bunita di Rufo Wever, entre otro e inmortal "Arubanita", "Souvenir di Aruba", "Glenda y Herbert" cu Rufo a componé pa su dos promé subrinonan, pa mencioná algun di nan.

Riba e CD aki no aparecé e pieza "Annette", cu el a componé pa su mama, pasobra esey a wordo reservá pa algo mas special ainda, riba otro CD cu lo mira luz despues di esaki. E CD aki tin varios curiosidad, manera un pieza di cahi'orgel cu a

wordo trahá den computer y casi no ta tende e diferencia. Tambe por scucha e violinista Sandor, kende ta toca tur anochi na Sonesta, como tambe un cuatro tocá pa Doedel Sophia y saxofon, un di e instrumentonan predilecto di Rufo Wever, tocá pa Lucio Rivadeneira.

Durante e presentacion Diarazon lo conta algo di e bida di Rufo Wever, kende a bai den historia como e músico y compositor cu e braza artificial. Ta trata aki di un bida de lo mas interesante. Pa loke ta e pianista Victor Camacho, e tambe tin un trayectoria musical suma-

mente exitoso tras di lomba.

El a cuminzá na edad di seis aña ora el a haya su promé les di piano cerca Carmen de Kort, kende actualmente ta kedando na Mari Stella na Savaneta. Fuera di esey el a haya les cerca Armando Lorenzini, Lucy Leslie Leonor y Rick Elings.

Ademas di música e ta ocupá un funcion importante tambe na Landslaboratorium. E ta conocí como un músico di clase cu ta dominá e piano completamente y kende su tocamento ta concordá completamente cu e estilo único di Rufo Wever. Pues, ta trata aki di un berdadero joya. □